

AKASHVANI AIZAWL
REGIONAL NEWS UNIT
REGIONAL NEWS BULLETIN
(MIDDAY)

Tuesday, August 19, 2025

Time - 2:30pm - 2:35pm



CM – BSF RECRUITMENT

Chief Minister Pu Lalduhoma'n Union Home Minister Amit Shah hnena a dil Mizo thalai 300 Border Security Force (BSF) a lakna tur Advertisement a chhuak chu lawmawm a tih thu a sawi.

Chief Minister hian social media kaltlangin he thu hi sawiin Union Home Minister Amit Shah hnena a ngenna angin Border Security Force (BSF) ah Mizo thalai mipa 255 leh hmeichhia 45 lak ani tur chu lawmawm atih thu a sawi a, Advertisement chu BSF website ah dah ani tih sawiin Mizo thalaiten ngaihven turin a duh thu a sawi.

Chief Minister chuan India sipai (Armed Force) Agnivee lakna hi kalpui mek a ni tih sawiin MLA Lt. Col Clement Lalhmingthanga chuan a vil reng a ti a, a diltu Mizo thalai 1000 chuang atangin Medical paltlang hi 163 an awm tawh a, Medical Review ngai, beiseina sang tak an neihna 39 an awm tih sawiin Sport Quota atangin 12 an tling a, Medical review ngai 3 an awm tiin an vaia an tlang chuan tun Agnivee recruitment-ah Mizo thalai 200 chuang an tling dawn tih a sawi bawk.

Pu Lalduhoma chuan Mizo Territorial Army (Home & Heart) chu kumin November thlaah khian mi 70 lakna kalpui a ni dawn a ti a. He hna dil tum tan MYC biakpawh theih reng an ni tih sawiin Territorial Army chu nakum lamah pawh lak belh zel theih an beisei a ti bawk.

BSF hotute hnen atanga thudawn danin, BSF sipai lak tur hi mipa 255 leh hmeichhia 45 a ni a, Mizoram-a cheng Schedules Tribes tan bik dil theih a ni a. September ni 1 atanga ni 18 chhung dilna hi theh luh theih niin, kumin August ni 1-a kum 18 tling chin, kum 28 aia upa lo tan dil theih a ni a, diltu chu pawl 10 pass a ni tur a ni.

Sipai lakna hi Serchhip, Champhai leh Khawzawl District tan Serchhip Stadium-ah, Lunglei, Hnahthial, Lawngtlai leh Siaha District tan Lena Stadium, Lunglei leh Aizawl, Mamit, Kolasib leh Saitual District tan Rajiv Gandhi Stadium Mualpui, Aizawlah neih a ni dawn a ni.



WATER SCARCITY

Public Health Engineering Department chuan Tlawng tui nu in ziaawm lam a pan theihloh avangin tui a nu nasa hle an ti a, hun engemaw chen Aizawlah tui sem a mumal theih dawnloh avangin mipuite hrethiam turin an ngen tih an sawi.

PHE thuchhuah tarlan danin Aizawl khawpui inngahna ber Tlawng lui tui nu in ziaawm lam a pan hleih theih loh avangin tui pump a khaih lak nasa hle an ti a. Kumin August thla chhunga Greater Aizawl Water Supply Scheme Phase 1 leh 2 te tui nu avangin vawi eng emaw zat pump hleih theih lohin an awm tih sawiin heng te avang hian Aizawl khawpui chhung tui sem nasa taka nghawngin hun eng emaw ti chhung chu khawpui chhung tui sem a la mumal thei dawn lo an ti a, Mipuite chu tui ren tur leh ruahtui khawl lama tan la turin an ngen tih sawiin tuisem khaihlak avanga mipuiin harsatna an tawh ah hriatthiamna an ngen tih an sawi bawk.



NF RAILWAYS

Wawin khan Northeast Frontier Railways Chief Engineer (Construction) Pu Vinod Kumar chuan Chief Minister Pu Lalduhoma hmuin Sairang rel station sak hna an thlen tawh chin a sawi fiah.

Chief Engineer hian Sairang station awm dan hrang hrang chipchiar takin a tarlang a. He station-ah hian platform inkalpawh tawna tur Subway pathum a awm dawn a. Khualzin lo thleng tharte chu leihnuai platform-atanga chhuakin ILP Check Post paltlang zelin an chhuak ang a. Bungraw hlanna platform lamah State Taxation hmunhma tur dahna hmun tur siam a ni bawh ang.

Chief Minister-in Union Railway Minister Pu Ashwini Vaishnaw hnena a lo thlen tawh angin, he station hi World Class station ni tura thuam that chhoh leh tur a ni a, Sairang rel station hi Prime Minister Pu Narendra Modi chuan a rawn hawng tura beisei a ni a, hemi atana inbuatsaihna pawh vawiin khan an sawi nghal a ni.



HOME MINISTER

Home Minister, Pu K. Sapdanga'n Mizoram Universal Health Care Scheme chu duhthusama a kimchan tawh loh avangin a ennawntu tur, Review Committee din a ni tih a sawi.

Home Minister hian nimin khan Lungleia Kohhran enkawl damdawi in pahnih, Christian Hospital Serkawn leh John Williams Hospital te a tlawh a; Mizoram Baptist Kohhran enkawl Christian Hospital Serkawn-a thawktute nen an in kawmnaah Christian Hospital-in Mizoram Universal Health Care Scheme an zawm avanga lawmthu sawi tur leh Sorkar tuam mawitu hmasa an nih avanga tlawh a nih thu a sawi a, Mizoram Universal Health Care Scheme chu duhthusama a kimchan tawh loh avangin a ennawn tur, Review Committee an din a, he committee-ah hian amah chu Chairman a nih thu leh Kohhran hospital te nen an tan ho chuan MUHCS chu hlawhtling taka kalpui theih a beisei thu a sawi.

Christian Hospital Serkawn hian kumin May ni 21 khan MUHCS hi an zawm tan a, vawiin thlengin damlo 786 enkawl tawhin, sorkar atangin damlo enkawl na senso cheng nuai 151.75 an hmu tawh a, chawhrualin kar tin cheng nuai 13.2 vel hmu thin ang an ni.



WORLD PHOTOGRAPHY DAY

Aizawl South 3 South bialtu, Pi Baryl Vanneihsang'n Mizoram School of Photography leh Photography Club of Mizoram ten World Photography Day kum 186-na puala Archives Hall, Babutlanga Photo Art Exhibition & Competition vawi 9-na an buatsaih a hawng.

He Photo Exhibition hian ni 5 chhung , vawiin August ni 19 atanga August ni 23, Inrinni thleng a awm dawn a, he Photo Exhibition & Competition hi a duh apiang tana tel theih niin Thupui thlan bik a awmlo a, thlalak 108 a lut a, mi 49 telin, vawiin hian result puan nghal a ni a. MSP Gold Award, Mama Ralte –Republic Vengthlang hnenah hlan niin, MSP Silver Award, Lalbiakzama – Dam Veng in a dawng a, MSP Bronze Award, Lalawmpuia – Model Veng hlan niin, Honourable Mention Award mi 5 hnenah pek an ni bawh.

Mizoram School of Photography chuan kum 2017 atang khan kumtin Photo Exhibition & Competition hi anmahni sum sengin Club member ten pawisa an thawhkhawm leh Entry fee lut atangin an buatsaih thin a, Mizote'n Photography pawimawh zia inzirtir nan te, Mizorama thing leh mau, nungchate humhalh an tul ziate, faina leh thianghlimna kawnga inzirtirna tha tak anih zia mipui zirtir theih nan Photo exhibition hi buatsaih thin a ni.



PRIME MINISTER

Prime Minister Narendra Modi chuan vawiin hian China Foreign Minister Wang Yi chu a chenna in New Delhi ah a hmu dawn a. He hunah hian ram pahnih inkara insumdawn tawna turte, ramri dinhmun leh hmalakna tur hrang hrangte bakah thlawhna service chungchange sawiho a ni ang.

External Affairs Minister Dr. S. Jaishankar chuan Prime Minister leh China Foreign Minister inkawmna neih tur chu a pawimawh hle thu sawiin, ram pahnih te inlaichhina tih thatna kawnga hmalakna pawimawh tak tur a nih thu a sawi.

